

## Bbaruha Gyakabiri Ginyakuhandiikwa Yohaana Kwanjuura

Bbaruha gigi gyegebeerwe nka *Bbaruha gya Yohaana gyakabiri*, gyahandiikiirwe mukwenda Yohaana. Beitu Yohaana yeezeta kwahi muhandiiki, kyonkei yeezeta muhandu wa kitebe kya beikiriza ba Yesu Kurisito. Yaagihandiikiiri “mugole munyakukomwa Ruhanga, hamwenya na baana baamwe” (1:1). Yohaana atekerezewa kubba yaabazengi ha kitebe kya beikiriza.

Mu bbaruha gigi Yohaana yoolokya nka kukili kihandu beikiriza ba Kurisito kwendyangananga, kandi de naalamba beikiriza ba Kurisito ha hubiibi hwa beegesa ba hugobya.

Bicweka Bihandu bya mu kiki Kitabbu nka Kubihonderegeeni

(i) Biramukyo 1:1-3

(ii) Buhandu hwa ngonzi 1:4-6

(iii) Kulamba ha nzegeya gya hugobya 1:7-11

(iv) Byakumaliira 1:12-13

### *Biramukyo*

<sup>1</sup> Gyagya muhandu, nkuramukya mugole munyakukomwa Ruhanga, hamwenya na baana baamwe banyendya mu mananu. Tali gyagya musa abendya, beitu na babwo benseenya beegiri mananu. <sup>2</sup> Nkukuramukya habwa mananu gali muli twe kandi gatukwiza kwicala nago biro byenseenya.

<sup>3</sup> Leka mbabazi, kisa na businge, biyo biruga hali Ruhanga Bbaa weetu na hali Yesu Kurisito mwana waamwe, biicalenge natwe mu mananu na mu ngonzi.

*Kulibatira mu Mananu na mu Ngonzi*

<sup>4</sup> Nyaasemereerwe hoj kuwona bamweji ha baana baamu mu Kurisito nibakuhondera mananu, nka Ruhanga Bbaa weetu kuyaaturagiji. <sup>5</sup> Hatj nu, nkukusaba mugole wange: leka twenseenya twendyengenenge. Kiki kili kwahi kiragiro kihyaka kinkubahandiikira, beitu kili kiragiro kitwiceeri nakyo kuruga hatwatandikiiri kwikiririza mu Kurisito. <sup>6</sup> Kwendyangana kunkubazaho kikumanyisya kwicala nituhonderanga biragiro bya Ruhanga. Kiragiro kya Ruhanga nka kumwakyegwiri, kurugira kimweji hamwatandikiiri kwikiririza mu Kurisito, kikoba nti nywenseenya mukuteekwa kwicalanga nimwendyangana.

<sup>7</sup> Bagobya banene babwo bakoba nti Yesu Kurisito atakabyalwe mu mubiri, bagyendiri mu nsi gyenseji. Yogwo yenseji abaza yatyo, abba mugobya kandi munyanzigwa wa Kurisito. <sup>8</sup> Kale nu, mwegyendereze mutafeerwa kikyo kimwakolereeri, beitu mutunge mpeera gyenyu gyenseenya.

<sup>9</sup> Muntu yenseji ateeryaho bigambu byamwe ha nzegesya gya Kurisito, akabula kwicala mu nzegesya gigyo, abba kwahi wa Ruhanga; beitu kandi yogwo yeemeera ha nzegesya gigyo, abba naali na Bbaa weetu na Mwana. <sup>10</sup> Nahabwakikyo kakubba muntu yenseji eiza muli nywe, akabba atakwegesya mananu ga Kurisito, mutamutwalanga mu nnyumba zeenyu rundi mutamutangiiranga. <sup>11</sup> Muntu yenseji akumutangiira, bubwo yogwo akubba naakuteerana nayo mu bikorwa byamwe bya bibii.

<sup>12</sup> Ndi na bintu binene byakubahandiikira. Mu kikiru kya kukoresya lupapura na wiino kubibahandiikira, nkunihira kubaungira, mbaze nanywe meiso na meiso, aleke nanywe musobore kusemererwa hoj hamwej natwe.

<sup>13</sup> Baana ba nyakeenyu, munyakukomwa Ruhanga, bakuramukiirye.

## Ndagaanu Gihyaka

Gungu: Ndagaanu Gihyaka New Testament

copyright © 2017 Wycliffe Bible Translators, Inc.

Language: Gungu

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 14 Jun 2022 from source files dated 13 Jun 2022

b2d1b010-ce36-53f8-94bb-ea31f34239cc